

讀

書

叢

錄

讀書叢錄卷二十二

臨海洪頤煊

後漢書序例

後漢書光武帝紀李賢注例曰多所誅殺曰屠又注臣賢案范曄序例云帝紀略依春秋惟孛彗日食地震書餘俱悉備於志安帝紀李注序例曰凡瑞應自和帝以上政事多美近於有實故書見於某處自安帝以下王道衰闕容或虛飾故書某處上言頤煊案後漢書序例今亡史記高祖本紀索隱引范曄云得城曰拔隋書魏澹傳范曄云春秋者文既總略好失事形合之擬作所以爲短紀傳者史班之所變也網

羅一代事義周悉通之後學此焉爲優故繼而述之
當亦序例之文

范書十志

宋書謝儼傳范曄所撰十志一皆託儼搜撰垂畢遇
曄敗悉蠟以覆車宋文帝令丹陽尹徐湛之就儼尋
不得一代以爲恨劉昭注補志序范曄後漢良史誠
跨衆氏序或未周志遂全闕序例所論備精與奪及
語八志頗褒其美又尋本書當作禮樂志其天文五
行百官車服爲名則同頤煊案東平王蒼傳車服作
輿服南齊書檀超傳百官依范曄合州郡則范志百
官當在州郡後也

范漢音

隋書經籍志蕭該漢書音義十二卷范漢音三卷光武帝紀鄒字注潞字注皇后紀嬬字注隗囂傳銳字注齊武王縝傳淳字注塾字注引蕭該皆范漢音之文或以此爲漢書音義則誤矣

劉昭志補注

隋書經籍志後漢書一百二十五卷范曄本梁剡令劉昭注梁書劉昭傳昭集後漢同異以注范曄書世稱博悉昭注補志序云乃借舊志注以補之分爲三十卷以合范史是昭未嘗注司馬彪全書唯取八志以合於范史故隋志及梁書本傳唯言注范書而不

別出彪書之注李賢注范書大率本於昭而八志全用昭注故題昭名以別之

蔡陽人

光武帝紀南陽蔡陽人頤煊案光武本蔡陽白水鄉人前書地理志引漢記云元朔五年以零陵泠道之春陵鄉封長沙王子買爲春陵侯至戴侯仁以春陵鄉地形下溼上書徙南陽元帝許之以蔡陽白水鄉徙仁爲春陵侯光武生於哀帝建平元年其時春陵建國已久不當云蔡陽人

新市平林

伯升於是招新市平林兵李注新市縣屬江夏郡在

蔡陽案此說見也春陵本鄉侯九
鄉而此則自名侯國矣漢書地理
志南陽郡下春陵班固自注曰侯國
故縣臨白水鄉上居鄉故唐陶孟
元帝所遷臨縣之白水鄉及上居
鄉置春陵侯侯國春陵馬王
功顯居邑是已否自見非侯國
也

嘉慶世祖更名有上居鄉可
知各後本已為縣非至光武
時改鄉為縣也范志光武紀
先士南陽蔡陽人既謀天下
至建武六年又云改各後鄉為
縣後縣亦誤

今郢州富水縣東北平林地名在今隨州隨縣東北
頤煊案郡國志南新市屬江夏郡前書地理志江夏
郡無新市縣是時新市平林皆當是鄉聚之名

大彤渠帥

又別號諸賊銅馬大彤李注大彤渠帥樊重頤煊案
耿弇傳故大彤渠帥重異李注重姓異名此注樊重
是重異之譌

蒲陽

光武復與大戰於蒲陽李注前書音義蒲陽山蒲水
所出在今定州北平縣西北本或作滿陽頤煊案鄧
禹傳陳俊傳馬成傳俱作滿陽蒲滿字形相近滿字

言書叢書卷三十一
三
者誤也

右北平

建武元年光武北擊尤來大槍五幡於元氏追至右北平連破之李注北平縣屬中山國臣賢案東觀記續漢書並無右字此加右誤也顧煊案耿弇傳作又追尤來大槍五幡於元氏弇常將精騎爲軍鋒輒破走之不言北平此於北平上加右字當涉弇傳下文追賊至潞東及平谷再戰遂窮追於右北平句而譌

順水

又戰於順水北李注酈元水經注云徐水經北平縣故城北光武追銅馬五幡破之於順水卽徐水之別

名本或作慎者誤也頤煊案耿弇傳馬武傳俱作慎
水慎順古字通用

南平棘

行到南平棘李注縣名屬常山郡頤煊案前書地理
志郡國志常山郡平棘縣皆無南字此當是王莽時
所加尋又除之

七郡

五年交阯牧鄧讓率七郡太守遣使奉貢李注七郡
謂南海蒼梧鬱林合浦交阯九真日南並屬交州頤
煊案岑彭傳初彭與交阯牧鄧讓厚善與讓書陳國
家威德於是讓與江夏太守侯登武陵太守王堂長

沙相韓福桂陽太守張隆零陵太守張翕蒼梧太守
杜穆交趾太守錫光等相率遣使貢獻悉封爲列侯
注誤

沈水

十一年輔威將軍臧宮與公孫述將延岑戰於沈水
李注水經注曰沈水出廣漢縣下入涪水本或作沉
水及沅水者並非頤煊案臧宮傳作沅水

望元氣

明帝紀永平二年升靈臺望元氣李注元氣天氣也
王者承天心理禮樂通上下四時之氣也故望之焉
頤煊案元氣當是雲氣之譌祭祀志永平二年正月

辛未初祀五帝於明堂卒事遂升靈臺以望雲物雲氣卽雲物也

夫犁

安帝紀元初二年八月遼東鮮卑圍無慮縣李注屬遼東郡九月又攻夫犁營殺縣令李注夫犁縣名屬遼東屬國鮮卑傳注同頤煊案郡國志遼東屬國無夫犁縣無慮縣有二一屬遼東郡一屬遼東屬國不應二縣同名近在一郡錢氏大昕攷異謂遼東屬國無慮是夫犁之譌庶或近之

虔人羌

延光元年秋七月虔人羌反攻穀羅城度遼將軍耿

夔討破之頤煊案是歲末已書虔人羌反攻穀羅城
度遼將軍耿夔討破之此節重出西羌傳延光元年
是歲虔人種羌與上郡胡反攻穀羅城度遼將軍耿
夔擊破之不云七月此是史之駁文未刊削者

王稠

順帝紀陽嘉二年三月使匈奴中郎將王稠率左骨
都侯等擊鮮卑破之頤煊案鮮卑傳作匈奴中郎將
趙稠

謝暉

桓帝紀建和元年清河劉文反殺國相謝暉欲立清
河王蒜頤煊案清河王傳文等遂劫清河相謝暉李

注帝紀謝作射蓋紀傳不同今本桓帝紀作謝暘是後人所改

平原王碩

二年封帝弟顧爲平原王奉孝崇皇祀頤煊案河間王開傳更封帝兄都鄉侯碩爲平原王孝崇匿皇后紀以帝弟平原王石爲喪主石卽碩字之省顧字誤也

荀昱

靈帝紀沛相荀翌頤煊案翌當作昱黨錮傳序作沛相荀昱荀淑傳淑兄子昱爲沛相竇武傳前越雋太守荀昱昱傳不載

孟馘

熹平六年太常河南孟馘爲太尉李注馘字叔達頤
煊案隸釋孟郁修堯廟碑濟陰太守河南偃師孟府
君諱郁字敬達三國志孟光傳河南洛陽人漢太尉
孟郁之族裴松之注續漢書郁中常侍孟賁之弟

益涼刺史

獻帝紀興平元年前益州刺史种劭戰歿頤煊案董
卓傳作涼州刺史种劭傳遂左轉議郎出爲益涼二
州刺史故紀傳不同

橐

光武郭皇后紀真定橐人也李注橐縣名故城在今

恒州橐城縣西頤煊案銚期傳攻拔樂陽橐肥壘前
書地理志橐城屬真定國城字當是王莽時省

泚陽

章德竇皇后紀父勲尙東海恭王彊女泚陽公主又
云尊母泚陽公主爲長公主竇融傳勲尙東海恭王
彊女泚陽公主頤煊案和帝紀東海恭王傳清河孝
王傳皆作比陽公主前書地理志郡國志南陽郡有
比陽而無泚陽桓帝鄧皇后紀康爲泚陽侯鮑昱傳
後爲泚陽長李注引東觀記亦作泚陽水經泚水注
應劭曰泚水出泚陽縣則作泚字爲是

偏將軍

劉永傳四年秋遣捕虜將軍馬武騎都尉王霸圍紆
建於垂惠頤煊案光武紀王梁傳俱作偏將軍王霸
王霸傳光武卽位拜爲偏將軍并將臧宮傳俊兵而
以宮俊爲騎都尉四年秋使霸與捕虜將軍馬武東
討周建於垂惠傳以霸爲騎都尉蓋涉宮俊而譌

許昌

李憲傳潁川許昌人也頤煊案郡國志潁川郡許縣
劉昭補注獻帝徙都改許昌此作許昌誤

彭宏

彭寵傳父宏哀帝時爲漁陽太守偉容貌能飲飯有
威於邊王莽居攝誅不附己者宏與何武鮑宣並遇

害頤煊案前書何武傳莽寢盛爲宰衡陰誅不附己者元始三年呂寬等事起連引諸所欲誅上黨鮑宣南陽彭偉杜公子偉卽宏也

大司徒司直

隗囂傳牛邯字孺卿大司空司直杜林太中大夫馬援並薦之頤煊案大司空是大司徒之譌杜林傳後代王良爲大司徒司直林薦同郡范逡趙秉申屠剛及隴西牛邯等皆被擢用百官志司徒下置司直建武十八年省司空下無此官

當塗高

公孫述傳帝乃與述書曰圖讖言代漢者當塗高君

豈高之身邪頤煊案三國志周羣傳父舒少學術於廣漢楊厚人有問春秋識曰代漢者當塗高此何謂也舒曰當塗高者魏也鄉黨學者私傳其語文選景福殿賦李善注引獻帝紀又以爲故白馬令李雲之言

臨邑侯

北海靖王傳封與子復爲臨邑侯復子駒駘及從兄平望侯毅並有才學頤煊案胡廣傳稱臨邑侯劉駒駘駒駘嗣父爵而本傳不言

考侯仁

城陽恭王傳子戴侯熊渠嗣熊渠卒子考侯仁嗣頤

煊案前書王子侯表作孝侯仁嗣

鄧王

順陽懷侯傳更始鄧王廖湛將赤眉十八萬攻嘉頤
煊案王常傳更始西都長安封爲鄧王劉玄傳廷尉
大將軍王常爲鄧王執金吾廖湛爲穰王此作鄧王
廖湛誤

當鄉

來歙傳以歙有平羌隴之功故改汝南之當鄉縣爲
征羌國焉頤煊案前書地理志無當鄉縣郡國志征
羌亦不言故當鄉范滂傳汝南征羌人李注謝承書
曰汝南細陽人疑當鄉縣東京初年割細陽所置故

承以滂爲細陽人

邑子

馮異傳異因薦邑子銚期叔壽段建左隆等頤煊案
異潁川父城人銚期潁川邠人同郡謂之邑子故彭
寵南陽宛人光武蔡陽人耿弇傳漁陽太守彭寵公
之邑人

菟肩

異復進麥飯兔肩頤煊案爾雅釋草菘菟葵郭璞注
頗似葵而小葉狀如藜有毛洵啖之滑又肩戎葵郭
璞注今蜀葵也似葵華如木槿華兔肩葵名一本作
菟肩

韓鴻南陽人

吳漢傳更始立使使者韓鴻徇河北李注續漢書曰
雒陽人韓鴻爲謁者頤煊案彭寵傳寵南陽宛人也
與鄉人吳漢亡至漁陽更始立使謁者韓鴻持節徇
北州鴻至薊以寵漢並鄉閭故人相見歡甚注雒陽
當是南陽之譌

太常將軍

陳俊傳以宗室劉嘉爲太常將軍俊爲長史頤煊案
順陽懷侯嘉傳更始卽位以爲偏將軍及攻破宛遷
大將軍劉玄傳更始乃先封宗室大將軍劉嘉爲漢
中王嘉未嘗爲太常將軍當是大將軍之譌

巨洋水

耿弇傳追至鉅昧水上李注鉅昧水一名巨洋水頤
煊案水經巨洋水注卽國語所謂具水矣袁宏謂之
巨昧王韶之以爲巨蔑亦或曰胸彌皆一水也洋當
作泮玉篇泮亡爾切亦泮字前書地理志引邶詩河
水泮泮卽河水泮泮後人誤作洋字

昌城

劉植傳鉅鹿昌城人也頤煊案前書地理志昌成屬
信都國邳彤傳李注東觀漢記曰王莽分鉅鹿郡爲
和成郡居下曲陽昌成之改屬鉅鹿當在此時和成
光武紀作和戎

劉喜

王郎起植與弟喜從兄歆迎世祖以植爲驍騎將軍喜歆偏將軍李注東觀記喜作嘉頤煊案岑彭傳偏將軍劉嘉等與彭并力討鄧奉嘉卽喜也

安陽

王梁傳漁陽安陽人也頤煊案前書地理志郡國志漁陽郡無安陽此當是要陽之譌

王游翁

馬援傳而納王游翁譖邪之說自謂函谷以西舉足可定李注游翁王元字也頤煊案隗囂傳元請以一丸泥爲大王東封函谷關元字惠孟李注引決錄平

陵王惠孟此稱游翁當是其別字

郡國百六

前披輿地圖見天下郡國百有六所頤煊案前書地理志凡郡國一百三王莽時置西海郡又分鉅鹿爲和成郡餘一不知名

扶樂

以扶樂侯劉隆爲副李注扶樂縣名屬九真郡頤煊案兩漢志九真郡無扶樂縣郡國志扶樂屬陳國劉隆傳明年復封爲扶樂鄉侯其時尚未置縣阜陵侯王傳建武三十年以汝南之長平西華新陽扶樂四縣益淮陽國劉隆卽於是年定封慎侯

許侯

封防潁陽侯光爲許陽侯頤煊案郡國志無許陽縣
下文其令許侯思憊田廬和帝紀許侯馬光自殺陽
是衍字

朱輔

今益州刺史朱輔頤煊案西南夷傳永平中益州刺
史梁國朱輔好立功名慷慨有大略李注東觀記輔
作輔梁國寧陵人也

宣德侯

卓茂傳今以茂爲太傅封褒德侯李注東觀記續漢
書皆作宣德侯頤煊案二十八將論亦作太傅宣德

侯卓茂

趙世

趙熹傳長子代給事黃門及薨子代嗣官至越騎校尉永元中副行征西將軍劉尚征羌坐事下獄頤煊案百官志補注引漢官儀明帝欲復更太尉府時公趙熹熹子世爲侍中和帝紀永元九年燒當羌寇隴西越騎校尉趙世等討破之此作代是唐人避諱所改來歷傳西羌傳亦作趙代

趙典

趙典傳再遷長樂少府衛尉公卿復表典篤學博聞宜備國師會病卒李注謝承書曰靈帝卽位典與竇

慈勉靈鑄所訂善新錄亦言東漢有兩趙典實非也范書趙典之子叔子者乃三子也范書言典之叔子叔子者乃三子也范書言典之叔子叔子者乃三子也范書言典之叔子叔子者乃三子也

武王暢陳蕃等謀共誅中常侍曹節侯覽趙忠等皆下獄自殺不言病卒頤熒案黨錮傳序李膺荀昱杜密王暢劉祐魏朗趙典朱寓爲八俊三君八俊等三十五人其名迹存者並載乎篇唯趙典名見而已是范史以八俊趙典與此蜀郡趙典別是一人故所載不同

兩州一郡

馮衍傳君長據位兩州加以一郡李注衍集鮑永行將軍事安集并州擁兵屯太原與太原李仲房同心并力頤熒案注引衍集義不明析鮑永傳行大將軍事持節將兵安集河東并州朔部朔部卽朔方郡也

年說通志引魏志云魏文帝于魏正
嘉多德法教家門永辰即經中
廟之年任其不信云與意公家言
諫帝違旨先官歸國會相帝前
與他到京師是事亦前名前與
正流故家門也本傳又言其息
澤諸侯無不愛封奉請一切削免
身土恩澤諸侯即謂相帝所封
之中也帝傳即謂相帝所封
中土官蓋古曰奉勅官官行皆是
皆與楊存瑞之官跡故名在後
列于實錄其事甚明無可疑也

朔方別置刺史不在十三州之列郭伋傳十一年省
朔方刺史屬并州時尙未省故與并部爲兩州河東
郡不屬并州是謂一郡兩州

平陽

陵飛廉而太息兮登平陽而懷傷李注平陽縣名故
城在今岐州岐山縣西南錢氏大昕攷異按兩漢三
輔無平陽縣史記秦本紀寧公徙居平陽正義云岐
山縣有陽平鄉鄉內有平陽聚頤煊案前書郊祀志
雍大兩壤平陽宮垣三輔黃圖秦有平陽宮故與飛
廉觀對言之注誤

劉龔

蘇竟傳初延岑護軍鄧仲况擁兵據南陽陰縣爲寇而劉歆兄子龔爲其謀主李注臣賢案前書及三輔決錄並云向曾孫今言歆兄子則不同也頤煊案下文龔字孟公長安人善論議扶風馬援班彪並器重之意林引桓譚新論劉子政子駿子駿兄子伯玉俱是通人未知是其人否前書王莽傳有明德侯劉龔

泰誓

是時月入于畢畢爲天網主網羅無道之君故武王將伐紂上祭於畢求助天也頤煊案史記周本紀九年武王上祭于畢東觀兵至于盟津集解馬融曰畢文王墓地名也此以畢爲星名當是泰誓今文家說

周天星度

郎顛傳熒惑以去年春分後十六日在婁五度推步
三統熒惑今當在翼九度今反在柳三度則不及五
十餘度頤煊案律厯志翼九度至柳三度相距四十
五度與三統星度不同

閏月

去年閏十月十七日己丑夜有白氣從西方天苑趨
左足入玉井數日乃滅頤煊案此陽嘉元年也順帝
紀是年閏十二月下文李注謂元年閏十二月己丑
夜有白氣入玉井是傳寫十下脫二字

以博士徵

襄楷傳中平中與荀爽鄭玄俱以博士徵不至頤煊
案袁宏後漢紀中平五年九月己未詔曰頃選舉失
所多非其人儒法雜揉學道寢微處士荀爽陳紀韓
融李楷耿道樂古志行高潔清貧隱約爲衆所歸其
以爽等各補博士皆不至李楷疑卽襄楷之譌

上谷大尹

郭伋傳王莽時爲上谷大尹李注王莽改太守爲大
尹頤煊案前書地理志上谷郡莽曰朔調耿弇傳父
况爲朔調連率此稱上谷誤

舉大司空

建武四年出爲中山太守明年轉爲漁陽太守九年

徵拜潁川太守十一年省朔方刺史屬并州帝以盧芳據北土廼調伋爲并州牧是時朝廷多舉伋可爲大司空帝以并部尙有盧芳之儼且匈奴未安欲使久於其事故不召頤煊案鄭興傳建武六年徵爲太中大夫明年三月晦日食興因上疏云今公卿大夫多舉漁陽太守郭伋可大司空者而不以時定則公卿之舉伋爲大司空當在九年以前迄十一年而尙未定

華首

樊宏傳故朝多皤皤之良華首之老李注皤皤白首貌也書曰皤皤多士華首謂白首也頤煊案經典凡

言華者皆謂黃色華首卽詩所謂黃耆也

博士舉狀

朱浮傳李注漢官儀博士舉狀曰生事愛敬喪沒如禮通易尙書孝經論語兼綜載籍窮微闡奧隱居樂道不求聞達身無金瘡痼疾世六屬不與妖惡交通王侯賞賜行應四科經任博士下言某官某甲保舉頤煊案通典卷二十七引後漢督郵板狀文俱同唯闡輿下有師事某官經明受謝見授門徒尙五十人以上正席謝坐三郡三人二十六字張輔傳郡吏王青者前郡守以青身有金夷竟不能舉前書薛宣傳博士申咸毀宣宣子况昧客楊明欲令創咸面目使

不居位此皆身有金瘡不得保舉之證

南粵嶠道

鄭弘傳舊交阯七郡貢獻轉運皆從東冶汎海而至
風波艱阻沈溺相係弘奏開零陵桂陽嶠道於是夷
通至今遂爲常路頤煊案前書武帝紀元鼎五年遣
伏波將軍路博德出桂陽下湟水樓船將軍楊僕出
豫章下瀘水歸義越侯嚴爲戈船將軍出零陵下離
水咸會番禺零陵桂陽嶠道本舊時所有弘特修通
之耳聞粵王傳樓船將軍僕上書請引兵擊東粵令
諸校留屯豫章梅領待命此卽出豫章下瀘水之道
瀘水南粵傳作橫浦

陵鄉侯

梁統傳後出爲九江太守定封陵鄉侯卒於官子松嗣頤煊案皇后紀皇女義王建武十五年封舞陽長公主適延陵鄉侯太僕梁松此傳陵上脫延字明帝紀亦作陵鄉侯梁松

齟齬笑

齟齬笑頤煊案齟當作齟說文齟齬不正也考工記鄭注人之牙齒參差謂之齟詩竹竿巧笑之嗒嗒卽齟字說文齟齬參差卽巧笑之貌風俗通云齟齬笑者若齒痛不忻忻失其義矣

武始

張純傳更封武始侯食富平之半李注武始縣屬魏郡富平縣屬平原郡頤煊案前書張安世傳放子純建武中歷位至大司空更封富平之別鄉爲武始侯注以魏郡之武始當之非是

鄭康成生日

鄭立傳五年春夢孔子告之曰起起今年歲在辰來年歲在巳既寤以讖合之知命當終其年六月卒年七十四頤煊案此建安五年也太平廣記卷二百十五引鄭立別傳鄭康成以永建二年七月戊寅生永建二年丁卯下距建安五年庚辰正七十四年順帝紀永建二年七月甲戌朔日有食之是鄭君以永建

二年七月五日生自余攷定撰康成年譜海內始知
有鄭君生日阮雲臺尙書前撫浙於西湖許鄭祠堂
列祀典焉

五經章句

桓榮傳初榮受朱普學章句四十萬言浮辭繁長多
過其實及榮減爲二十三萬言郁復刪省定成十二
萬言頤熒案伏恭傳初父黯章句繁多恭廼省減浮
辭定爲二十萬言張奐傳初牟氏章句浮辭繁多有
四十五萬餘言奐減爲九萬言諸儒章句唯趙歧孟
子章指傳於今敷衍文義其大指如今之鄉塾講章
蓋當時博士傳習設科射策利祿所在士爭趨之通

儒不之覽焉

魯陽鄉

丁鴻傳建初四年徙封魯陽鄉侯李注東觀記曰魯陽鄉在尋陽郡也頤煊案前書地理志郡國志尋陽屬廬江郡並未別置郡郡當是縣字之譌下文元和三年徙封馬亭鄉侯馬亭在尋陽見郡國志補注其地與魯陽相近

菑丘

劉般傳光武下詔封般爲菑丘侯奉孝王祀後以國屬楚王徙封杼秋侯頤煊案前書地理志留丘本屬楚國未知此時改屬何郡

讀書叢錄卷二十三

臨海洪頤煊

廣平太守

班彪傳父稚哀帝時爲廣平太守頤煊案前書敘傳
哀帝卽位出穉爲西河屬國都尉遷廣平相地理志
廣平國武帝征和二年置爲平干國宣帝五鳳二年
復故諸侯王表平干征和二年頃王偃以敬肅王小
子立十一年薨元鳳元年繆王元嗣二十四年五鳳
二年坐殺謁者會薨不得代則自平干廢後廣平仍
置爲郡哀帝建平三年正月壬寅王漢以夷王弟紹
封廣平稚先遷廣平太守後隨國改爲相敘傳據終

後言之故所載不同

清詔使

第五倫傳種字與先永壽中以司徒掾清詔使冀州廉察災害李注風俗通曰汝南周勃辟太尉清詔使荆州又此言以司徒清詔使冀州蓋三公府有清詔員以承詔使也頤煊案范滂傳舉孝廉光祿四行時冀州饑荒盜賊並起以滂爲清詔使案察之

堂邑

鍾離意傳遷堂邑令李注堂邑故城在今博州堂邑縣西北頤煊案前書地理志堂邑屬臨淮郡郡國志堂邑屬廣陵郡質帝紀廣陵賊張嬰等復反攻殺堂

邑長李注堂邑縣屬廣陵郡今揚州六合縣也此注
失之

浚道

宋均傳浚道縣有唐后二山民共祠之李注浚道縣
屬廬江郡故城在今廬州慎縣南頤煊案郡國志浚
道縣屬九江郡劉昭補注宋均傳縣有唐后二山是
也注作屬廬江郡誤

宗俱

意字伯志孫俱靈帝時爲司空頤煊案靈帝紀建寧
四年太常宗俱爲司空李注俱字伯儷南陽安衆人
此亦宋均當作宗均之一證

黃老

楚王英傳晚節更喜黃老學爲浮屠齋戒祭祀詔報
曰楚王誦黃老之微言尙浮屠之祠此道清淨貴尙
無爲頤煊案襄楷傳又聞宮中立黃老浮屠之祠皇
甫嵩傳初鉅鹿張角奉事黃老道畜養弟子跪拜首
過劉焉傳李注典略曰以老子五千文使都習號三
國志烏丸傳裴松之注浮屠經曰浮屠所載與中國
老子經相出入佛經未入中土以前學浮屠者皆誦
黃老之言

東朝陽

濟南安王傳建武三十年以平原之祝阿安德朝陽

平昌隰陰重丘六縣益濟南國頤煊案朝陽前書地理志屬濟南不知何時改屬平原是東漢初年之制下文其後人上書告康顯宗以親親故但削祝阿隰陰東朝陽安德西平昌五縣朝陽上加東字平昌上加西字當卽在顯宗時

懷王忠

東平憲王傳子懷王忠嗣立十一年薨頤煊案憲王以建初八年薨懷王忠卽以是年嗣章帝紀元和元年九月乙未東平王忠薨忠立僅一年十字衍

參戶亭

任城孝王傳桓帝立河間孝王子恭爲參戶亭侯李

注杜預注左傳曰今丹水縣有三戶亭故城在今鄧
州內鄉縣西南頤煊案前書地理志勃海郡有參戶
縣水經濁漳水注應劭曰平舒縣西南五十里有參
戶亭故縣也恭封當在此

池陽鄉

張酺傳汝南細陽人趙王張敖之後也敖子壽封細
陽之池陽鄉後廢因家焉頤煊案前書張耳傳宣平
侯敖薨廼封其前婦子二人壽爲樂昌侯侈爲信都
侯地理志樂昌屬東郡當是壽封樂昌侯食邑在細
陽之池陽鄉

殺諷

陳寵傳尚書令祝諷李注祝或作殺又云順帝之爲
太子廢也諸名臣來厯祝諷等守闕固爭頤煊案來
厯傳作光祿勳殺諷李注殺丁外反鄧隲傳亦作殺
諷

筆耕

班超傳安能久事筆研間乎李注續漢書作久弄筆
研乎華嶠書作久事筆耕乎頤煊案文選任彥昇爲
蕭楊州作薦士表旣筆耕爲養李善注東觀漢記班
超歎曰安久筆耕乎耕或爲研

西平八縣

陳敬王傳建初七年乃徙羨爲西平王分汝南八縣

爲國及帝崩遺詔徙封爲陳王食淮陽郡和帝紀章
和二年三月丁酉改淮陽爲陳國西平并汝南郡遺
詔徙西平王羨爲陳王頤煊案本傳下文永元十一
年吏捕得久繫長平獄有司奏鈞坐削西華項新陽
三縣十二年復坐削圍宜祿扶溝三縣西平長平西
華項新陽宜祿六縣皆舊屬汝南郡美徙封陳其八
縣并入淮陽未嘗并入汝南疑紀誤

修條同縣

樂成靖王傳和帝立崇兄修侯巡爲樂成王是爲釐
王李注修縣及條縣皆屬勃海條字或作修頤煊案
前書地理志脩屬信都國師古曰脩音條郡國志修

屬勃海郡注云故屬信都而別無條縣修卽條也

程夫人

崔駟傳程夫人於旁應曰崔公冀州名士豈肯買官
頤煊案劉翊傳陽翟黃綱恃程夫人權力求占山澤
蔡邕傳今者道路紛紛復云有程夫人者陳球傳陽
球小妻程璜之女璜用事宮中所謂程夫人也皆是
一人蔡邕傳陳球傳作程大人疑傳寫之譌

袁奉高

黃憲傳郭林宗少游汝南先過袁閎不宿而退進往
從憲累日方還或以問林宗林宗曰奉高之器譬諸
汎濫雖清而易挹頤煊案袁閎當作袁閎閎字夏甫

閩字奉高見王龔傳

務鄉

楊震傳追前功封務亭侯李注郡國志桃林縣有務鄉頤煊案郡國志弘農郡弘農有桃丘聚故桃林有務鄉桃林非縣名劉玄傳與赤眉戰於務鄉李注續漢志弘農有務鄉斯得之矣

魏郡劉鮪

清河孝王傳建和元年甘陵人劉文與南郡妖賊劉鮪交通訛言清河王當統天下欲共立蒜頤煊案李固傳甘陵劉文魏郡劉鮪各謀立蒜爲天子甘陵魏郡皆與清河相近此作南郡誤朱穆傳作嚴鮪

亳皇后

李雲傳又立掖庭民女亳氏爲皇后頤煊案桓帝鄧皇后紀后少孤隨母爲居因冒姓梁氏及懿獻后崩梁冀誅立后爲皇后帝惡梁氏改姓爲薄四年有司奏后本郎中鄧香之女於是復爲鄧氏此在延熹三年故稱亳也五行志延熹四年五月尙稱亳后其復姓當在五月以後桓帝紀延熹二年八月壬午立皇后鄧氏是史臣追書之

子孟生

虞詡傳中常侍孟生頤煊案許冲上說文表慎前以詔書校書東觀教小黃門孟生李喜等當卽其人

算罔論

張衡傳著靈憲算罔論李注衡集無算罔論蓋網絡
天地而算之因名焉頤煊案九章算術劉徽注引張
衡算謂立方爲質立圓爲渾又言質六十四之面渾
二十五之面又云方八之面圓六之面疑皆算罔論
之文

皮傳

後人皮傳無所容纂李注揚雄方言曰秦晉言非其
事謂之皮傳謂不深得其情核皮膚淺近強相傳會
也後人不達皮膚之意流俗本多作頤煊傳者誤也頤
煊案頗偏也謂以偏辭相傳會義亦得通

更始建號

又更始居位人無異望光武初爲其將然後卽真宜以更始之號建於光武之初頤煊案前書律歷志更始帝著紀以漢宗室滅王莽卽位二年赤眉賊立宗室劉盆子滅更始帝自漢元年訖更始二年凡二百三十歲更始稱帝其說正與衡同

校書郎中

馬融傳拜爲校書郎中李注謝承及續漢書並云爲校書郎又拜郎中也頤煊案鄧騭傳郎中馬融龐參傳校書郎中馬融並不稱校書郎

司徒橋立

蔡邕傳建寧三年辟司徒橋立府頤煊案司徒當作司空靈帝紀建寧三年八月大鴻臚喬立爲司空四年三月司徒許訓免司空橋立爲司徒

程璜

叔父衛尉質又與將作大匠楊球有隙球卽中常侍程璜女夫也錢氏大昕攷異楊當作陽據陳球傳則程璜卽程大人乃是女子此傳云中常侍則是宦者非婦人矣頤煊案陳球傳用事宮中者是程璜之女非璜也傳於用事上衍一璜字致有此錯詳見上

涅陽

左雄傳南郡涅陽人也頤煊案當作南陽郡

荀諝

荀淑傳爽字慈明一名諝頤煊案三國志虞翻傳裴松之注翻別傳頤川荀諝號爲知易諝卽爽也

李翕

皇甫規傳先是安定太守孫儁受取狼籍屬國都尉李翕督軍御史張稟多殺降羌頤煊案隸釋有武都太守李翕西狹頤析里橋郟閣頤翕字伯都漢陽阿陽人

寫

有旋車完封寫之權門李注言覆軍之將旋師之日多載珍寶封印完全便入權門頤煊案說文寫置物

也卸舍車解馬也从口止午讀如汝南人寫書之寫
寫卽卸字

金鑠

張負傳又遺金鑠八枚李注郭璞注山海經云鑠音
渠金食器名未詳形制也頤煊案山海經中山經魃
武羅穿耳以鑠郭璞注鑠金銀器之名李注食當是
銀字之譌莊子達生篇梓慶削木爲鑠釋文引司馬
注鑠樂器也似夾鍾

孔融不見李固

孔融傳年十歲隨父詣京師時河南尹李膺李注膺
潁川襄城人融家傳曰聞漢中李公清節直亮意慕

之遂造公門李固漢中人爲太尉與此傳不同頤煊
案獻帝紀建安十三年八月曹操殺太中大夫孔融
傳云時年五十六融當生於永興元年桓帝紀建和
元年十一月前太尉李固下獄死時融尙未生

甄子然

融爲北海相郡人甄子然臨孝存知名早卒融恨不
及之乃命配食縣社頤煊案第五種傳種坐徙朔方
門下掾孫斌乃謂其友人同縣閻子直及高密甄子
然曰云云於是斌格殺送吏種匿於閻甄氏袁宏後
漢紀有北海甄子然送張儉事而范史張儉傳不載

涼州

皇甫嵩傳五年梁州賊王國圍陳倉頤煊案靈帝紀
中平五年十一月涼州賊王國圍陳倉右將軍皇甫
嵩救之梁字誤

种拂

陶謙傳太僕种拂舉爲方正頤煊案种拂傳累遷光
祿大夫初平元年代荀爽爲司空明年以地震策免
復爲太常獻帝紀初平三年六月戊午陷長安城太
常种拂戰歿拂未嘗爲太僕當是太常之譌

中軍校尉

袁紹傳中平五年初置西園八校尉以紹爲佐軍校
尉李注樂資山陽公載記袁紹爲中軍校尉此云佐

軍與彼文不同頤煊案何進傳虎賁中郎將袁紹爲中軍校尉蓋勳傳五行志俱作佐軍校尉袁紹

紙

蔡倫傳自古書契多編以竹簡其用縑帛者謂之爲紙縑貴而簡重並不便於人倫迺造意用樹膚麻頭及敝布魚網以爲紙元興元年奏上之頤煊案賈逵傳建初三年書奏與簡紙經傳各一通李注竹簡及紙也說文紙絮也服虔通俗文方絮曰紙皆尙是縑紙

元初當作永初

元初元年鄧太后以倫久在宿衛封爲龍亭侯四年

帝以經傳之文多不正定廼選通儒謁者劉珍及博士良史詣東觀各讎校漢家法令倫監典其事頤熒案劉珍傳永初中爲謁者僕射鄧太后詔使與校書劉駒除馬融及五經博士校定東觀五經諸子傳記百家藝術整齊脫誤是正文字安帝紀永初四年二月詔謁者劉珍及五經博士校定東觀五經諸子傳記百家藝術整齊脫誤是正文字此元初是永初之譌

州輔

曹騰傳桓帝得立騰與長樂太僕州輔等七人以定策功皆封亭侯頤熒案隸釋州輔碑輔拜長樂太僕

以定冊功封葉吉成侯葉吉成者南陽葉縣之吉成亭也

楊仲桓

楊倫傳字仲理陳留東昏人也頤煊案楊震傳震舉薦明經名士陳留楊倫等李注字仲桓謝承書薦楊仲桓等五人各從家拜博士與此字仲理不同

光祿勳

召馴傳章和二年代任隗爲光祿勳頤煊案章帝紀章和元年光祿勳任隗爲司空則馴之代隗亦當在章和元年

漢舊儀

衛宏傳宏作漢舊儀四篇以載西京雜事頤煊案南齊書禮志序漢初叔孫通制漢禮而班固之志不載及至東京太尉胡廣撰舊儀左中郎蔡邕造獨斷應劭蔡質咸綴識時事檀超傳蔡邕稱先師胡廣說漢舊儀皆以漢舊儀爲胡廣作隋書經籍志漢舊儀四卷衛敬仲撰

宣氏

張玄傳諸生上言玄兼說嚴氏宣氏不宜專爲顏氏博士頤煊案公羊家無宣氏前書儒林傳貢禹授頤川堂谿惠惠授泰山冥都都與路又事顏安樂故顏氏復有筦冥之學宣氏疑冥氏之譌

劉秋孫

劉珍傳字秋孫一名寶南陽蔡陽人也永初中校定東觀五經諸子傳記百家藝術永寧元年遷侍中越騎校尉延光四年拜宗正明年轉衛尉卒官李注諸本時有作祕孫者其人名珍與祕義相扶而作秋者多也頤煊案百官志補注引胡廣小學漢官篇注曰前安帝時越騎校尉劉千秋校書東觀好事者樊長孫與書云云劉君甚然其言與邑子通人郎中張平子參議未定而劉君遷爲宗正衛尉千秋卽珍之別字則本作秋孫者是

鍼石

趙壹傳鍼石運乎手爪李注古者以石爲鍼頤焯案說文砭以石刺病也山海經高氏之山多針石郭璞注可以爲砭針春秋左氏傳美疹不如惡石服虔注石砭石也古法治病灼石鍼以灸之後世專用艾而砭石之法亡矣

司徒袁逢

光和元年舉郡上計到京師是時司徒袁逢受計頤焯案靈帝紀光和元年二月癸丑光祿勳陳國袁滂爲司徒冬十月屯騎校尉袁逢爲司空二年三月司徒袁滂免大鴻臚劉郃爲司徒京兆地震司空袁逢罷元年受計者非袁逢也

王暉

譙玄傳平帝元始四年選明達政事能班化風俗者
八人時並舉玄爲繡衣使者持節與太僕任暉分行
天下頤煊案前書平帝紀作太僕王暉百官公卿表
亦作王暉子敬

鋏斧

戴就傳又燒鋏斧使就挾於肘腋李注何承天纂文
曰畱今之鋏也張揖字詁曰畱刃也鋏音華說文字
林三蒼並無鋏字頤煊案鋏本從吳作鋏吳越春秋
兩鋏殖宮牆者農夫就成田夫耕也又云兩鋏殖宮
牆者越軍入吳國伐宗廟掘社稷也一切經音義卷

十六鏤此古文奇字鐸說文作采

壽光侯

解奴辜傳初章帝時有壽光侯者能効百鬼衆魅令
自縛見形李注壽姓也錢氏大昕考異壽光國名光
武封更始子鯉爲壽光侯又北海王普初封壽光侯
是也此侯失其姓名故舉其爵頤煊案葛洪神仙傳
引此作劉憑以軍功封壽光金鄉侯范史無其人

篡篡

逸民傳序鴻飛冥冥弋者何篡李注篡字諸本或作
篡頤煊案今本法言作篡宋衷曰篡取也文選作篡
李善引宋衷注今篡或爲篡誤也魏齊州刺史高湛

墓誌慕申穆之遺風慕卽慕字

嚴光一名遵

嚴光傳字子陵一名遵會稽餘姚人也頤煊案藝文類聚卷一引會稽典錄嚴遵字子陵卷五引鍾離意別傳嚴遵昔與光武俱爲諸生開元占經卷八十三引後漢書曰嚴遵字子陵會稽餘姚人世祖爲諸生時與遵游學

貂豹

東夷傳夫餘國出名馬赤玉貂豹李注豹似豹無前足頤煊案爾雅釋獸貂無前足釋文貂本作豹字林云獸無前足似虎而黑此貂豹連稱當言其皮可爲

裘者非豹獸說文豹鼠屬善旋从豸穴聲篆文作豹
與豹字相類因譌注誤證

究不事人

南蠻傳肅宗元和元年日南徼外蠻夷究不事人邑
豪獻生犀白雉李注究不事人蠻夷別號也頤煊案
究蠻夷附落名不事人謂不屬於人水經葉榆水注
馬援將兵討側詩走入金溪究交州外域記交阯郡
界有扶巖究皆是

斗歷改憲

律歷志甲寅詔曰春秋保乾圖曰三百年斗歷改憲
頤煊案志凡四引三百年斗歷改憲皆保乾圖之文

案此作究係通假傳云微側據
馬援前人所受其故傳其傳今
本漢書馬援傳注引起云云伏
查入金溪究此疑究作究也

陳寵傳春秋保乾圖曰王者三百年一蠲法漢興以
來三百二年憲令稍增科條無限郎顛傳孔子曰漢
三百載計歷改憲自文武省刑適三百年楊厚傳陳
漢三百五十年之厄宜蠲法改憲之道改憲不專歷
家斗當是計字之譌

禊

禮儀志上巳官民皆絜於東流水上補注謂之禊也
風俗通曰周禮女巫掌歲時以祓除疾病禊者絜也
頤煊案說文無禊字絜契古字通用俗加示旁作禊

夏勤策文

補注丁孚漢儀有夏勤策文曰維元初六年三月甲

子制詔以大鴻臚勤爲司徒頤煊案安帝紀永初三
年夏四月丙寅大鴻臚九江夏勤爲司徒與此年月
全異

瑕丘丁氏

祭祀志補注馬第伯封禪儀記曰二月九日到魯十
日魯遣宗室諸劉及孔氏瑕丘丁氏上壽受賜頤煊
案前書外戚傳定陶丁姬易祖師丁將軍之玄孫家
在山陽瑕丘丁將軍卽丁寬梁人其子孫在瑕丘

清河王蒜

天文志蒜以惡人所劫廢爲尉氏侯又徙捷陽都鄉
侯薨國絕頤煊案桓帝紀清河孝王傳並云蒜坐貶

爲尉氏侯徙桂陽自殺

方儲

五行志補注引方儲對策三條頤煊案藝文類聚卷八十八引後漢方儲字聖明遭母憂負土成墳松柏數十株鸞鳥棲其上白兔遊其下太平御覽卷三百四十五引謝承後漢書曰丹陽方儲爲郎中章帝使文郎居左武郎居右儲正住中曰臣文武兼備在所施用上嘉其才以繁亂絲付儲使理之儲拔佩刀三斷之對曰反經任勢臨事宜然頃見歙縣志有方儲傳注云出元秘書李孝光集疑是謝承書之文今錄於此

方儲字聖公精孟氏易通圖讖建初四年舉孝廉又舉賢良方正對策爲天下第一五年春二月庚辰朔日有食之詔舉直言極諫之士丹陽太守周歆以儲進儲極言天降灾咎之由上召見儲等試解笏絲衆莫能理儲拔劔斷絲對曰反經任勢臨事宜然上深偉之除郎中尋出爲句曲令六年遷阜陵令遭母喪奠土成墳種松柏嘉木數十本致鸞鶴白兔之瑞元和初轉洛陽令和帝永元五年六月將郊祭以儲善天文問之勸帝毋往其日天清明帝遂行詔責其欺儲曰臣受書先師推步萌兆今咎時且至願乘輿亟還使者去儲歎曰爲人臣恥蒙不忠名遂自殺比駕

還雨雹大如鴈子鹵簿後乘士皆疾馳去帝大驚使
召儲儲已死帝甚傷之追太常尙書令封豨侯詔護
其喪還葬世皆言聖公仙去於是民廟祀之兄儕南
郡太守儼丹陽太守剛果皆類儲

郡國大水

中平五年郡國六大水出補注臣昭案袁山松書曰
山陽梁沛彭城下邳東海琅邪則是七郡頤煊案靈
帝紀中平五年郡國七大水

費澤

郡國志河南尹滎陽有費澤補注左傳宣十二年楚
潘黨逐魏錡及榮杜預曰縣東滎澤也頤煊案以補

注證之費澤當是滎澤之譌水經濟水注京相璠曰
滎澤在滎陽縣東南

廣城

新城有廣城聚補注有廣城苑頤煊案陳蕃傳車駕
幸廣城校獵李注廣城苑名在今汝州梁縣西馬融
傳作廣成

蔡城

河內郡山陽邑有蔡城補注蔡叔邑此猶鄭管城之
類乎頤煊案水經沁水注丹水逕郟城西司馬彪郡
國志曰山陽有郟城京相璠曰河內山陽西北六十
里有郟城竹書紀年曰梁惠王元年趙成侯偃韓懿

侯若伐我葵卽此城也與劉昭本異

嚴城

京兆尹新豐有嚴城頤煊案劉玄傳及赤眉立劉盆子更始使王匡陳牧成丹趙萌屯新豐李松軍擲以拒之李注擲音子侯反續漢志曰新豐有鴻門亭擲城卽此也嚴是擲字之譌

固始

汝南郡固始故寢也光武中興更名有寢丘頤煊案前書地理志寢屬汝南郡固始屬淮陽國光武以固始并入寢又改寢爲固始故志於固始下不言故屬淮陽

沙鹿

魏郡元城墟故沙鹿頤煊案墟上有脫字當作有五鹿墟故沙鹿前書元后傳元城郭東有五鹿之虛卽沙鹿地也是其證

饒陽

安平國饒陽故名饒屬涿頤煊案前書地理志涿郡屬縣本名饒陽光武紀光武趣駕南轅至饒陽東京初年亦不作饒此名饒二字是衍文五行志解瀆亭屬饒陽河間縣也是順帝以後所改

堂陽

東平國東平陸有堂陽亭補注故縣後省頤煊案前

書地理志堂陽屬鉅鹿郡東京省與此絕遠注誤證

東海郡

東海郡錢氏大昕攷異按光武封子彊爲東海王傳國最久中間無改國爲郡之事此郡字當爲國之譌又按建武二年封兄子興爲魯王二十八年徙封北海此後無封魯王者而志稱國不稱郡蓋自光武以魯國益封東海恭王終東京之世魯常爲東海國所屬而魯國之名未改頤煊案東海恭王傳帝以彊廢不以過去就有禮故優以大封兼食魯郡合二十九縣初魯恭王好宮室起靈光殿甚壯麗是時猶存故詔彊都魯是彊封東海而國都在魯故終東京之世

楚越東漢是矣然使終東漢之世
東海何為郡則當置不置尚不可
矣何云不傳傳云東海郡屬延津
若傳云東海郡屬延津則當置不
傳傳云下郡時為東海郡屬延津
為東海郡屬延津之屬置郡明矣
東海郡云傳云春王子靖王此漢
傳云豫州刺史惠和奏請漢廷又
置郡云傳云王為常州刺史之傳
置郡初亦無可疑後春王傳云王
武十九年封為安海王二十八年就國
亦傳云王封王在魯郡王元武
先封王子德為王明中為東海王
及明中王為太子乃名東海封王不
武之子王冬春王傳云就國云春
王傳云北海王王德及東海王時
置郡東海已各傳置郡故曰而不
易終漢之世兩海皆有郡也

魯稱國置相而東海仍為郡錢氏之說非也

攝城

樂安國蓼城補注杜預曰縣東北有攝城頤煊案左
氏昭二十年傳聊攝以東杜預注聊攝齊西界也平
原聊城縣東北有攝城蓼城非聊城注誤證

蓼國

南陽郡棘陽有黃淳聚補注杜預曰蓼國在東南前
志蓼國湖陽是頤煊案蓼當作廖前書地理志湖陽
故廖國也師古曰廖音力救反左氏傳作颺字其音
同耳蓼國在六安臯陶後為楚所滅與此別

東部候官

會稽郡東部侯國錢氏攷異按宋書州郡志侯官前漢無後漢曰東侯官屬會稽此東部侯國當卽東侯官之譌頤煊案三國志虞翻傳翻追隨營護到東部侯官侯官長閉城不受東部侯官會稽東部之侯官城也張掖屬國上郡龜茲屬國皆有侯官城後省稱爲東侯官

邛郵置

蜀郡屬國嚴道有邛樊九折坂者邛刻置頤煊案前書淮南厲王傳有司奏請處蜀嚴道邛郵張晏曰嚴道蜀郡縣也邛郵置名邛刻置當是邛郵置之譌

北新城

涿郡北新城頤煊案孫程涿郡新城人也李注東觀
記曰北新城人前書地理志北新城屬中山國此不
言故屬中山亦脫文

讀書叢錄卷二十四

臨海洪頤煊

周易註疏

周易兼義九卷題國子祭酒上護軍曲阜縣開國子
臣孔穎達奉勅撰正義第三行題王弼注繫辭以下
題韓康伯注上經乾傳等字俱與大題相連前有孔
穎達周易正義序并八論末附陸德明周易音義一
卷王弼周易畧例一卷黑口本每葉廿行行廿字

毛詩註疏

附釋音毛詩註疏二十卷分共七十卷題唐國子祭
酒上護軍曲阜縣開國子孔穎達奉勅撰前有孔穎

達毛詩正義序黑口本每葉廿行行廿字

周禮註疏

附釋音周禮註疏四十二卷題朝散大夫行太學博士弘文館學士臣賈公彥等奉勅撰國子博士兼太子中允贈齊州刺史吳縣開國男臣陸德明釋文前有賈公彥周禮正義序又序周禮廢興一篇黑口本每葉廿行行十七字

禮記註疏

附釋音禮記註疏六十二卷題國子祭酒上護軍曲阜縣開國子臣孔穎達等撰國子博士兼太子中允贈齊州刺史吳縣開國男臣陸德明釋文前有孔穎

達禮記正義序又禮記正義一篇不題撰人名氏黑口本每葉廿行行十七字

左傳註疏

附釋音春秋左傳註疏六十卷題孔穎達陸德明銜名與禮記註疏本同唯孔穎達等字下有奉勅二字前有孔穎達春秋正義序黑口本每葉廿行行十七字

公羊註疏

監本附音春秋公羊註疏二十八卷前何休序疏不在卷中每卷某公俱與大題相連天祿琳琅宋本卷首有景德二年六月中書門下牒此本失之黑口

本每葉廿行行十七字

穀梁註疏

監本附音春秋穀梁註疏二十卷題范甯集解楊士
勛疏每卷某公亦與大題相連前有范甯序黑口本
每葉廿行行十七字

孝經註疏

孝經註疏九卷前有孝經註疏序序前有小引次題
翰林侍講學士朝請大夫守國子祭酒上柱國賜紫
金魚袋臣邢昺等奉勅校定注疏成都府學主鄉貢
傅注奉右撰第一卷前亦有邢昺銜名黑口本每葉
廿行行十七字以上八種皆南宋閩中所刊卽世所

稱十行本也間有明正德嘉靖補刻葉唯孝經殘缺最多原葉幾無一二存矣阮尙書南昌學宮刊本卽從此本翻雕

伊川周易

伊川先生點校附音周易二卷前後無序跋宋刊本每葉廿四行行廿二字卷末有今將伊川先生點校古本逐卦附入陸德明釋音寫作大字刊行刻畫精微並無差誤收書賢士伏幸詳鑿木長印宋諱字俱闕筆

書經集註

書經集註十卷題蔡沈集註前有嘉定己巳蔡沈序

末附書序元刊黑口巾箱本每葉十八行行十七字
據晁氏讀書志天祿琳琅藏本蔡沈書集傳俱作
六卷此本改集傳作集註六卷作十卷當是坊間重
刻本

書疑

魯齋書疑九卷前有寶祐丁巳王柏自序柏此書直
取經文或刪或補重爲編定變亂妄作久爲世所詬
病此本尙是宋刊黑口日本每葉廿二行行廿一字

儀禮

儀禮十七卷前後無序跋十七篇止載經文無注黑
口本每葉廿行行廿字補刻葉板心有閩何校三字

當亦南宋閩中所刊未附儀禮旁通圖一卷

春秋集解

春秋經傳集解三十卷每卷首某公第幾俱與大題相連次行題杜氏前有杜預春秋序附載陸德明音義巾箱本每葉廿行行大字十八字末卷尾有淳熙柔兆涸灘中夏初吉閩山阮仲猷種德堂刊木長印宣十二年傳屈蕩尸之惠定字補注稱明人所見淳熙巾箱本作戶字卽此本也

左傳句讀直解

音註全文春秋括例始末左傳句讀直解七十卷題梅谿林堯叟唐翁句解宋刊黑口本每葉廿二行行

廿四字今世所行惟有王道焜杜林合注此乃其原帙也

春秋纂疏

春秋胡氏傳纂疏三十卷題新安汪克寬學前有引用諸儒姓氏凡例汪克寬自序至正辛巳虞集序至元四年汪澤民序末有至正八年吳國英跋元刊黑口本每葉廿二行行廿字

論語叢說

讀論語叢說三卷題東陽許謙前有至正七年張樞序元刊黑口本每葉小字卅二行行廿六字

禮書

禮書一百五十卷目錄一卷題左宣義郎太常博士
臣陳祥道上進前有進禮書表禮書序建中靖國元
年禮部尚書牒晁氏讀志題作太常禮書又有象目
五彩飾本皆與此本不同此本亦宋刊每葉廿六行
行約廿一二字

樂書

樂書二百卷目錄一卷題迪功郎建昌軍南豐縣主
簿林宇冲校勘前有慶元庚申楊萬里三山陳先生
樂書序陳暘進樂書序建中靖國元年牒并議詔勅
一卷慶元己未三山陳歧跋後有林宇冲題識此本
與前禮書同時並刊故行款字數摹印紙色俱同每

葉廿六行行約廿一二字

六子全書

纂圖互註六子老子道德經二卷題河上公章句南
華真經十卷題晉郭象子玄註冲虛至德真經八卷
次行題列子張湛處度註荀子二十卷題唐大理評
事楊倞注揚子法言十卷題晉李軌唐柳宗元註次
行題聖宋宋咸吳祕司馬光重添註中說十卷題阮
逸註前俱有圖每條下有重言重意互註俱用黑蓋
子別之不題撰人名氏宋刊黑口中箱本每葉廿二
行行廿一字

老子膚齋口義

老子膚齋口義二卷題須溪劉辰翁點校膚齋爲宋
林希逸號希逸紹定間進士官中書舍人萬姓統譜
作獻齋所著有老莊列口義此特其一種耳劉須溪
評語屢入注中俱用黑蓋子別之宋刊黑口本每葉
廿二行行十八字

呂氏春秋

呂氏春秋二十六卷前有遂昌鄭元祐序後有嘉興
路儒學教授陳華至正口口吳興謝盛之刊一行卽
所謂元嘉禾學宮本也目錄後有鏡湖遺老記每葉
廿行行廿字

劉子

劉子十卷目錄前題劉子新論梁通事舍人劉勰撰
播州錄事參軍袁孝政註此書唐志作梁劉勰撰陳
氏書錄解題晁氏讀書志俱據袁孝政序文作北齊
劉勰撰此本無袁序而題作劉勰與唐志同宋刊巾
箱本每葉廿二行行十八字

夢谿筆談

夢谿筆談二十六卷題沈括存中前有沈括自序書
中國家詔書等字俱空一格元刊黑口本每葉廿四
行行十八字

困學紀聞

困學紀聞二十卷題浚儀王應麟伯厚前有泰定二

年袁榭序至治二年牟應龍序序後有牟應龍印牟伯成父儒林世家三木小方印目錄前有深寧叟識語後有伯厚甫深寧居士二木小方印元刊黑口本每葉廿行行十八字

北堂書鈔

北堂書鈔一百六十卷題秘書郎虞世南撰此書今世所行止有陳禹謨刪改本此舊影宋鈔本字畫舛譌幾於不可句讀頃在廣東又見一舊鈔本其譌舛大畧相同唯讀書敏求記聞嘉禾收藏家有原書蒐訪十餘年而始得繕寫精妙播閱之心目朗然當勝於此兩本也

初學記

新刊初學記三十卷題光祿大夫行右散騎常侍集賢院學士副知院事開國公徐堅等奉勅撰前有紹興四年福唐劉本序元刊黑口本每葉廿行行廿字

事類賦

事類賦三十卷題宋博士渤海吳淑撰註前有淑註事類賦狀紹興丙寅邊惇德序末卷後有邊惇德陳綬李端民三人校勘銜名元刊黑口本每葉廿二行行廿字

玉海

玉海二百四卷題浚儀王應麟伯厚甫玉海本二百

卷末四卷爲詞學指南前有胡助阿殷圖王介李桓
四序至元三年浙東道宣慰使司刊刻玉海指揮後
有也乞里不花等銜名目錄後有慶元路儒學刊造
玉海書籍提調官銜名其詩考等十三種據至元六
年厚孫跋語亦同時並刊唯不在目錄之中每葉廿
行行廿字間有明正德二年嘉靖庚戌至丁巳補葉

韻府羣玉

新增說文韻府羣玉二十八卷題晚學陰時夫勁弦
編輯新吳陰中夫復春編註前有翰林滕賓序至大
庚戌江村姚雲序吳興趙孟頫題字元刊黑口本每
葉廿二行行小字廿九字

羣書備數

羣書備數十二卷題臨江張九韶美和編目錄前有
自序書分十二門畧如小學紺珠以備記誦之學九
韶元時累舉不第洪武間辟爲清江教諭書中地名
官制俱至元止是元時刻本也黑口板每葉廿行行
廿一字

圖繪寶鑑

圖繪寶鑑五卷補遺一卷題吳興夏文彥士良纂前
有至正乙巳夏文彥序據汲古閣本前尚有抱遺老
人楊維禎序此本失之元刊黑口巾箱本每葉廿二
行行廿字

齊民要術

齊民要術十卷題後魏高陽太守賈思勰撰前有思勰自序此書世有明胡震亨刻本第三卷闕第二葉此本亦闕中多未刻字校者俱注於當行之上元刊本每葉廿行行大字十八字

黃帝內經素問

新刊補註釋文黃帝內經素問十二卷題啟玄子次註林億孫奇高保衡等奉勅校正孫兆重改誤前有啟玄子王冰序總目一卷後題云元本二十四卷今併爲一十二卷刊行末卷後有至元己卯萑節古林書堂新刊木長印末附素問入式論與二卷遺篇一

言學寶錄卷二十一 九
卷黑口本每葉廿三行行廿三字

傷寒論

傷寒論註解十卷題仲景述王叔和撰次成無己註
解前有甲子洛陽嚴器之序目錄一卷圖解運氣一
卷後有孝口木方印東山鼎式木印大德甲辰歲孝
永堂重刊木長印黑口本每葉廿四行行廿四字

傷寒百問

類證增註傷寒百問歌四卷卷一爲傷寒解惑論前
有乾道癸巳湯尹才序解惑論卽尹才所撰未有淳
熙壬寅韓玉跋卷二以下爲傷寒百問題建寧府通
守錢聞禮撰前有至大己酉武夷詹清子子敬序此

書爲曹仲立取湯錢兩家書合刻詹氏序而行之元刊黑口巾箱本每葉廿二行行廿一字

千金要方

重刊孫真人備急千金要方三十卷題朝奉郎守太常少卿充秘閣校理判登聞檢院上護軍賜緋魚袋臣林億等校前有目錄一卷綱目一卷錢象先等校正序經進後序晁氏讀書志陳振孫書錄解題俱是此本宋刊黑口本每葉廿四行行廿二字

本草衍義

本草衍義二十卷題通直郎添差充收買藥材所辨驗藥材寇宗奭編撰前有政和六年十二月二十八

日付寇宗奭劄後題宜和元年月本宅鏤板印造姪
宣教郎知解州解縣丞寇約校勘黑口本每葉廿四
行行廿一字

大觀本草

經史證類大觀本草三十一卷目錄一卷題唐慎微
纂前有大觀二年十月朔通仕郎行杭州仁和縣尉
管勾學事艾晟序卽陳氏書錄解題本也卷二以下
大觀改作大全據艾序又本名經史證類備急本草
宋刊黑口本每葉廿四行行廿字

政和本草

重修政和經史證類備用本草三十卷題成都唐慎

徵續證類中衛大夫康州防禦使勾當龍德宮總轄
修建明堂所醫藥提舉入內醫官編類聖濟經提舉
大醫學臣曹孝忠奉勅校勘每卷下有己酉新增衍
義六字前有政和六年曹孝忠序別本有大定己酉
麻革序及劉昶跋此本失之黑口大字本每葉廿四
行行廿三字

史載之方

史載之方二卷據施彥清北窗災輟錄稱史載之以
紫苑治蔡元長大腸秘固得名載之爲北宋末年人
影宋鈔本每葉廿二行行十七字

集驗醫方

類編朱氏集驗醫方十五卷題湘麓朱佐君輔集前有咸淳元年朱景行序分十五門餘皆依類附之宋刊黑口本每葉廿二行行廿二字

蘭室秘藏

新刊東垣先生蘭室秘藏三卷題東垣老人李杲撰四庫全書本前有至元丙子羅天益序此本無之元刊黑口中箱本每葉廿行行十七字

婦人良方

新編婦人良方補遺大全二十四卷前有卷首辨識修製藥物法度一卷目錄一卷題臨川陳自明良甫編集齋峯熊宗立道軒補遺又有嘉熙元年八月良

日建康府明道書院醫論臨川陳自明良父序宋刊
本每葉廿四行行廿二字

太白陰經

神機制敵太白陰經十卷題唐都虞候李筌撰前有
唐永泰四年李筌進書序後有羅士良張永和朱永
中譚元吉趙承信等銜名舊影宋鈔本 四庫全書
本止八卷前缺天無陰陽地無險阻二卷又失卷八
分野風角鳥情卷九遁甲卷十立女式等篇此本猶
全

大象賦注

張衡大象賦一卷題苗爲注困學紀聞大象賦唐志

謂黃冠子李播撰李台集解今本題楊炯撰畢懷亮
注館閣書目題張衡撰李淳風注皆與此本不同此
是孫之騷手鈔本與宋史藝文志同喬令來步天歌
注引張衡云洪興祖楚辭補注引天文大象賦注皆
是此書

會天歷

大宋寶祐四年丙辰歲會天萬年具注歷一卷前有
太史局劄子後有寶祐二年十月靈臺郎鄧宗文成
永祥二人銜名卷末又有荆執禮楊旗相師堯譚王
鄧宗文等五人銜名影宋寫本據周密癸辛雜識寶
祐四年節氣四月四日立夏此歷在二日八月八日

白露此歷在七日九月九日寒露此歷在十日十二月十二日小寒此歷在十一日豈所據別歷抑小說家傳聞譌邪

金匱玉衡經

黃帝金匱玉衡經一卷在道藏薑字號影鈔本前有
序皆作四字韻語金匱經十條玉衡經十條皆論天
乙六壬發用據吳越春秋子胥日竊觀金匱第八今
年七月辛亥平旦大吉爲白虎而臨辛功曹爲太常
而臨亥大吉得辛爲九醜與此金匱第八經同范蠡
日事將有意在玉門第一今年十二月戊寅之日時
加卯而賊戊功曹爲騰蛇而臨戊謀事利在青龍青

龍在勝光而臨酉死氣也而尅寅是時尅其日用又助之與此玉衡第一經同文種曰吾見王時正犯玉門之第八也辰尅其日上賊於下是謂亂醜必害其良與此玉衡第八經同足證春秋吳越時所用卽是此書玉衡序作玉房與玉門義近

五變中黃經

五變中黃經一卷不著撰人名氏自釋己身至釋應期凡四十二章焦竑經籍志六壬類有此書舊影宋鈔本 四庫全書有二卷本其篇次已變亂矣

疑龍經

疑龍經一卷題唐國師楊筠松撰疑龍二篇附疑龍

十問衛龍篇變星篇宋刊黑口本每葉廿八行行廿
五字

辨正論

辨正論八卷題唐沙門釋法琳撰前有東宮學士陳
子良序在釋藏陪字號書共十二篇晁氏讀書志云
宣和中以其斥老子語焚毀其第二第四第五第六
第八凡五卷序文亦有剪棄者此本八卷俱全其中
頗引古書明初刊本每葉十二行行十七字卷後有
聚寶門來賓樓姜家印行木長印

甄正論

甄正論二卷題唐佛授記寺沙門玄奘撰在釋藏

言部彙編卷之二十四 古
字號此書託滯俗公子甄正先生荅問大旨屈老以
伸佛其文筆甚古雅明初刊本每葉十二行行十七
字

集沙門不應拜俗等事

集沙門不應拜俗等事六卷題弘福寺沙門釋彥棕
纂錄前有太原王隱容序在釋藏冠字號書分三篇
所錄多六朝唐人之文明初刊本每葉十二行行十
七字

神異經

神異經一卷題漢東方朔撰晉張華注舊鈔本隋書
經籍志有此書水經河水注引張華敘東方朔神異

經左氏文十八年正義引服虔案神異經檮杌狀似
虎一段與今本不同

漢武內傳

漢武帝內傳一卷外傳一卷不題撰人姓名在道藏
海字號舊影鈔本唐志內傳作二卷俗本脫玄靈二
曲十二字篇目及朱雀窗一段此本俱全外傳隋唐
志不載後漢書方術傳李賢注引魯女生封君達東
郭延年王真事皆作漢武內傳此卽內傳之下卷由
後人誤題作外傳耳

史記

史記一百三十卷皆小題在上大題在下前有目錄

一卷三皇本紀史記正義論例謚法解張守節史記正義序司馬貞史記索隱序書中所載止有集解索隱無正義也宋刊黑口小字本每葉廿八行行廿五字

資治通鑑

資治通鑑二百九十四卷題朝散大夫右諫議大夫權御史中丞充理檢使上護軍賜紫金魚袋臣司馬光奉勅編集後學天台胡三省音註後卷光銜名隨官改換前有元豐七年光進書表元祐元年下杭州鏤板銜名紹興二年下紹興府餘姚縣印造銜名皆宋刊資治通鑑原帙據黃溥簡籍遺聞是書元未刊

於臨海洪武初取其板藏南京國學卽此本也黑口本每葉廿行行廿字

通鑑紀事本末

通鑑紀事本末四十二卷目錄一卷題建安袁樞編前有淳熙元年楊萬里序一本前又有寶祐丁巳趙與憲序延祐六年陳良弼序稱節齋患嚴陵本字小且譌於是精加雘校易爲大字刊版而家藏之後節齋孫趙明安者始出所藏板眞之嘉禾學宮此卽宋刊大字本每葉廿二行行十九字

戰國策

戰國策十卷題縉雲鮑彪校註東陽吳師道重校前

有戰國策劉向序會鞏序紹興十七年鮑彪序泰定二年吳師道序至正十五年陳祖仁序後有李文叔等題跋末卷尾有平江路儒學正徐昭文校勘十一字黑口本每葉廿二行行廿字

吳越春秋

吳越春秋十卷題後漢趙晔撰前有徐天祐序書中音註卽天祐作末卷後有大德十年歲在丙午三月音註越六月書成刊版十二月畢工每葉十八行行十七字

名臣碑傳

新刊名臣碑傳琬琰之集上二十七卷中五十五卷

下二十五卷題眉州進士杜大珪編前有紹熙甲寅序宋史藝文志晁氏讀書志陳氏書錄解題俱無此書宋刊本每葉卅行行廿五字

范文正公遺跡

范文正公遺跡一冊不分卷數亦不著撰人姓氏分山東吳中西夏洛陽公所至之處各記其名勝碑記雜文并冠以圖字畫工整元刊本

高僧傳

高僧傳十四卷題梁嘉祥寺沙門釋慧皎撰在釋藏輦驅二字號書分十例每僧各爲之傳始于漢永平十年終于梁天監十八年二百五十七人又旁出附

見者二百餘人三國志吳書孫皓以天紀四年三月降晉此書康僧會傳作四月通鑑宋文帝元嘉十年涓渠牧健改元永和此書浮陀跋摩傳作承和皆足以資考證明初刊本每葉十二行行十七字

通志

通志二百卷前有總目一卷總序一篇題右迪功郎鄭樵至治壬戌吳繹序又疏一篇後有至治二年九月印造福州路總管府所委提調官各銜名劉堦隱居通議近大德歲間東宮有令下福州府刊通志凡萬幾千板卽此大字本每葉十八行行廿一字

方輿勝覽

新編方輿勝覽七十卷題建安祝穆和父編前有嘉熙巳亥呂午序祝穆自序所載止南宋輿圖分十八子目宋刊黑口本每葉小字廿八行行廿八字

中吳紀聞

中吳紀聞六卷題崑山龔明之前有淳熙元年龔明之序目錄一卷末有至正二十五年武寧盧熊記卷六石湖下八條有目無書元刊黑口本每葉廿二行行廿一字

金陵新志

金陵新志十五卷前有甲申四月江南諸道行御史臺都事索元偕序鈔錄修志文移臺府提調官掾職

名修志本末題前奉元路學古書院山長張鉉輯末
有督刊姓氏此卽元至正四年刊本每葉十八行行
十八字

茅山志

茅山志十五卷題上清嗣宗師劉大彬造自註副墨
至金薤編凡十二篇前有泰定甲子趙世延泰定丁
卯吳全節天歷戊辰劉大彬序末卷後有金華道士
錢唐西湖隱真庵開山何道士施梓十八字元刊黑
口本每葉廿六行行廿三字

赤城志

赤城志四十卷前有嘉定癸未郡人陳耆卿序未有

嘉定十六年郡守齊碩跋 四庫全書據晁氏讀書
稱原本尙有十三圖今已佚矣此本尙存九圖又後
人附以萬歷丙申二圖余搜訪十餘年庚申歲始於
武林書肆得之宋刊黑口大字本每葉廿行行廿字

文苑英華

文苑英華一千卷前有纂修文苑英華事始嘉泰四
年周必大序每卷後有登仕郎胡柯鄉貢進士彭叔
夏校正未卷後有新差充筠州臨江軍巡轄馬遞鋪
王恭點對兼督工一行此從嘉泰刊本影鈔大字本
每葉廿行行廿字惜中多闕卷書賈往往割一卷爲
兩卷以充全數前後倒亂未爲全璧然其佳處迥非

明隆慶刊本所可及也

文苑英華辨證

會通館印正文苑英華辨證十卷前有嘉泰四年彭叔夏序宋本文苑英華每卷本附辨證此則其單行本也舊影宋鈔本據周益公文苑英華序始雕於嘉泰改元春至四年秋訖工此編序末題嘉泰四年冬十有二月己丑朔鄉貢進士廬陵彭叔夏謹識則此編作於英華刊成之後故異同詳畧不復追改

金石例

蒼崖先生金石例十卷題鄱陽楊本編輯校正目錄前又題王思明重校正前有至正五年楊本序至正

戊子王思明序此書爲元潘昂霄所撰蒼崖其號也
至正乙酉楊本刻于饒州戊子王思明復梓之此卽
思明所刊黑口本每葉廿行行廿二字

唐詩輯註

唐詩始音輯註一卷正音輯註六卷遺響輯註七卷
題襄城楊士宏伯謙編次新淦張震文亮輯註前有
至正四年楊士宏序并凡例目錄後有廣勤堂鼎式
木印建安葉氏鼎新綉梓木長印元刊黑口本每葉
廿行行十八字

蔡中郎文集

蔡中郎文集十卷外傳一卷題漢左中郎將蔡邕伯

楷撰前有天聖癸亥歐靜序每葉題作單行大字正文作雙行小字目錄後有正德乙亥春三月錫山蘭雪堂華堅允剛活字銅板印行廿二字每葉十四行行十二字

曹子建集

曹子建集十卷題魏陳思王曹植撰前有吳郡徐伯虬序不署年月稱郭子萬程雅好是集刊布以傳萬程閩清人嘉靖己未進士官刑部主事見明詩綜末有曹集疑字音釋二葉卽晁氏讀書志所見本每葉十八行行十七字

嵇康集

嵇中散集十卷每卷目錄在前前有嘉靖乙酉黃省
會序三國志邴原傳裴松之注張貌父邈字叔遼自
然好學論在嵇康集今本亦有此篇又詩六十六首
與王楙野客叢書本同是從宋本翻雕每葉廿二行
行廿字

陶淵明集

箋註陶淵明集十卷前有梁昭明太子序總論一卷
題廬陵後學李公煥集錄詩文句下畧有箋釋間採
東坡山谷趙泉山韓子蒼湯東澗張綬胡仔諸家之
論附於詩後未有陽休之以下序記一卷宋刊黑口
巾箱本每葉十八行行十五字

駱賓王集

駱賓王文集十卷前有唐書本傳明刻駱集有四卷
六卷八卷之本此本乃元時所刊與晁氏讀書志陳
氏書錄解題卷數相同據書錄解題卷首有魯國郝
雲卿序而此本無之每葉廿二行行十八字

李太白詩

分類補註李太白詩二十五卷闕七卷題春陵楊濟
賢子見集註章貢蕭士斌粹可補註前有至元辛卯
蕭士斌序目錄後有建安余氏勤有堂刊八字篆書
木長印又有李陽冰以下序記一卷元刊黑口本每
葉廿四行行廿字

杜工部詩

集千家註分類杜工部詩二十五卷題東萊徐居仁
編次臨川黃鶴補註前有杜工部傳序碑銘一卷後
有廣勤書堂新刊六字木長印年譜一卷目錄一卷
集註姓氏後有三峯書舍鐘式木印廣勤堂三字鼎
式木印元刊黑口本每葉廿四行行廿字

又

集千家註批點杜工部詩集二十卷題須溪先生劉
會孟評點前有大德癸卯劉將孫序序後有須溪劉
氏將孫尚友父五木印年譜一卷目錄一卷末卷已
闕後人鈔補元刊黑口本每葉廿二行行廿三字

陸宣公集

唐陸宣公集二十二卷目錄一卷前有權德輿翰苑集序進奏議劄子一篇陸宣公像至大辛亥厲一鶚序目錄後有題識至大辛亥秋教官厲心齋奏總管王公子中命重新繡梓云云黑口本每葉廿二行行十九字

韓昌黎集

朱文公校昌黎先生文集四十卷題晦庵朱先生考異留耕王先生音釋目錄一卷題李漢編集前有朱文公韓文考異序寶慶二年王伯大序校集凡例末有題識稱今本宅所刊係將南劔州官本爲據併將

音釋附正集云云宋刊黑口本每葉廿六行行廿三字

柳河東集

增廣註釋音辯唐柳先生集四十二卷別集二卷外傳二卷附錄一卷題南城先生童宗說註釋新安先生張敦頤音辯雲間先生潘緯音義前有劉禹錫序年譜乾道三年陸之淵柳文音義序卽爲潘緯作也宋刊黑口本每葉廿六行行廿二字

蘇東坡詩

增刊校正王狀元集註分類東坡先生詩二十五卷題宋禮部尚書端明殿學士兼侍讀學士贈太師謚

文忠公蘇軾廬陵須溪劉辰翁批點前有東坡先生
詩序王十朋一篇趙公夔一篇集註姓氏題狀元王
公十朋龜陵纂集後有廬陵口口口書堂新刊十
字木長印元刊黑口本每葉廿四行行廿一字

趙子昂集

松雪齋文集十卷外集一卷行狀謚文一卷目錄一
卷前有大德戊戌戴表元序未有至元後已卯何貞
立序沈璜跋稱松雪翁薨幾二十年今從公子仲穆
求假全集再加校正合爲一十二卷亟鈐諸牒云云
元刊黑口本每葉廿四行行廿二字